

# Bastuns dad arder a Fukushima senza aua

**En il Giapun vegn la situaziun en l'ovra atomara Fukushima adina pli precara: I dat rapports ch'il nuschegl atomic dal reactor saja luà.**

Trais dals sis reacturs da l'ovra atomara Fukushima I han il mument gronds problems da segirtad. L'emprova da sfradentar ils bastuns dad arder cun aua da la mar en il segund reactor n'è sco ch'i para betg gartegiada. Il livel d'aua per sfradentar il reactor saja sa sbassà dramaticamain ed ils bastuns na sajan per part betg cuverts cun aua pli, communitgeschan las autoritads. Meds da massa giapunais avevan rapportà, ch'ils bastuns dad arder dal segund reactor sajan gia dal tutfatg en il sitg e betg pli cuverts cun aua da la mar. Vinavant emprovan ins da sfradentar cun aua da la mar ils dus auters reacturs. Entant rapportan perditgas ch'in nivel da radioactivitad sa movia sur il Pacific e che per-

sunas sajan pertutgadas. Questas infurmaziuns n'èn dentant betg confermadadas.

## Segunda explosiun a Fukushima

Glindesdi avantmezdi aveva quai dà ina segunda explosiun a Fukushima. Quella giada dentant en il reactor 3. I dat dentant differents rapports sche la cupla da betun è donnegiada u betg. Tenor indicaziuns da la regenza, saja la cuverta dal reactor anc intacta. L'acziun da sfradentar in dals reacturs a Fukushima cun aua da la mar è para stada in success. La temperatura dal reactor è sa sbassada sut 100 grads celsius. Quai annunzia l'agentura da novitads Jiji. Meds da massa rapportan dentant ch'il sistem da sfradentar il reactor na funcziuneschia betg pli. Ils bastuns d'arder sajan per part betg cuverts pli cun aua. La situaziun en las ovras atomaras para da sa mi-

dar cuntinuant e las infurmaziuns èn cuntradictoras.

## Chattà 2000 baras

Entant cumbatta la populaziun cun las consequenzas dal terratreml e dal tsunami. 1,4 milliuns persunas n'hajan nagina aua da baiver e victualias e benzin sajan stgars, ha l'ONU communitgà. Passa in mez milliun persunas n'hajan nagin sut-tetg e sajan en alloschis provisories. Ed er il dumber d'unfrendas crescha vinavant. En la regiun da Miyagi han ins chattà da quai da 2000 baras. Quai rapportan medias indigenas. Tenor indicaziuns uffizialas èn mortas 5000 persunas. Ins spetga dentant passa 10'000 unfrendas.

## Svizzers arrivan en regiun da tsunami

Colonnas d'agid da l'entir mund han cumenzà a tschertgar las persunas sparidas

en il nord-ost dal Giapun. L'equipa svizra n'ha anc betg pudì cumenzar cun la tschertga suenter las persunas sparidas pervia d'in alarm da tsunami. Tenor il Departament federal per fatgs da l'exterior è ina gruppia cun 23 specialists arrivada a Tome datiers da la citad da Sendai ch'è pertutgada fitg dal terratreml e dal tsunami. In'otra gruppia da quatter experts per l'agid urgent spetga anc a Tokio sin la lubientscha da pudair ir en la regiun da catastrofa.

## Nikkei sa sbassa per 6,2 pertschient

La bursa da Tokio, l'index da Nikkei, ha reagì sin la catastrofa cun grondas sperditas. En las emprimas minutas han ins registrà in minus d'enturn 4%. La fin ha il Nikkei serrà tar 9620,49 puncts: in minus da 6,2 pertschient en cumparegliaziun cun il venderdi. Gia il venderdi, il di

da la catastrofa, aveva il Nikkei serrà cun in minus dad 1,7%. La firma Tepco che maina plirs reacturs atomars è vegnida sclausa dal commerzi perquai ch'i ha dà memia bleras ordas da vendita.

## Gronds donns suenter la catastrofa dal terratreml

La catastrofa dal terratreml en il Giapun ha chaschunà donns economics da 170 fin 180 milliardas dollars, quai tenor ina stimaziun da la banca gronda Credit Suisse. Quai fissan stgars 40% dal donn ch'il terratreml da Kobe aveva chaschunà il 1995. En la regiun dal terratreml actual, ch'ha suenter era anc patì dal tsunami, dettia damain sgrattaschiels, fabricas ed autostradas che a Kobe, hai gi tar la Credit Suisse. La reassicuranza Swiss Re ha ditg ch'ins na possia anc betg calcular ils donns en il Giapun.